

PRAVILA PRIVATNOSTI

Cilj Pravila privatnosti Federalne uprave policije je da, u skladu sa članom 68. Zakona o zaštiti ličnih podataka (u daljem tekstu: Zakon), svim licima, čije lične podatke Federalna uprava policije obrađuje u okviru postupaka koje provodi, uz izuzetke propisane posebnim zakonom, na transparentan način pruži informacije o obradi njihovih ličnih podataka.

Pravila privatnosti se primjenjuju na sve lične podatke koje Federalna uprava policije prikuplja, upotrebljava ili na drugi način obrađuje, direktno ili putem drugih kontrolora.

Prema Zakonu dole navedeni pojmovi imaju sljedeća značenja:

Lični podatak je svaki podatak koji se odnosi na fizičku osobu čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatiziranim ili neautomatiziranim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombiniranje, ograničenje, brisanje ili uništavanje.

Kontrolor podataka je fizička ili pravna osoba, javni organ ili nadležni organ koji samostalno ili sa drugim određuje svrhu i sredstva obrade ličnih podataka.

Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravne osobe ako su zakonom ovlaštene za obavljanje ovih poslova kao posebna kategorija.

1. Podaci o kontroloru podataka

Federalna uprava policije, Mehmeda Spahe broj 7, 71 000 Sarajevo

Tel: +387 33 280 – 020

Fax: +387 33 590 – 233

E-mail: kabinet@fup.gov.ba

Službenik za zaštitu ličnih podataka

Tel: +387 33 280 – 020 lokal 3466

E-mail: zospi@fup.gov.ba

2. Svrha i pravni osnov za obradu ličnih podataka

Vaše lične podatke Federalna uprava policije obrađuje u skladu sa Zakonom, a na osnovu člana 31. Zakona o unutrašnjim poslovima („Službene novine Federacije BiH“, broj 81/14), izvršavajući svoje nadležnosti i ovlaštenja. Navedene nadležnosti i ovlaštenja uključuju:

- neposredno poduzimanje mjera na sprečavanju i otkrivanju krivičnih djela terorizma, međukantonalnog kriminala, stavljanja u promet opojnih droga, organiziranog kriminala i drugih krivičnih djela iz nadležnosti Federacije Bosne i Hercegovine, kao i na pronalaženju njihovih učinilaca;
- obavljanje kriminalističko-tehničkih vještačenja za svoje potrebe, kao i na traženje drugih nadležnih organa;
- organiziranje i neposredno osiguravanje određenih osoba i zgrade Federacije u skladu sa propisom, izrađuje odgovarajuće operativne planove;
- pripremanje prijedloga ukupnog broja policijskih službenika za potrebe Uprave policije i kriterija za njeno popunjavanje;
- raspisivanje i objavljivanje Interpolove, međunarodne, federalne i međukantonalne potrage;
- saradivanje sa nadležnim tužilaštvima u vezi sa obradom krivičnih predmeta;
- obavljanje i drugih poslova i zadataka policije koje joj, u skladu sa zakonom, povjere sudovi i tužilaštva u Bosni i Hercegovini;
- predlaganje programa stručnog osposobljavanja i usavršavanja državnih službenika i namještenika u Upravi policije;
- nabavljanje naoružanja i opreme u skladu sa propisom iz člana 17. Zakona o unutrašnjim poslovima i materijalno-tehničkih sredstava za potrebe Uprave policije;
- vođenje statističke i operativne evidencije potrebne za obavljanje poslova iz svoje nadležnosti;
- predlaganje i praćenje provedbe planova o izgradnji i korištenju informacionog sistema;
- osiguravanje jedinstvene obrade podataka iz nadležnosti Uprave policije;
- predlaganje organiziranja, razvoja, modernizacije i održavanja funkcionalnog sistema veza i obavljanje poslova prijenosa zaštićenih informacija u vezi sa radom policije;
- organiziranje jedinstvenog sistema obavješćavanja potrebnog za obavljanje poslova iz nadležnosti Uprave policije;
- izrađuje i predlaže programe obrazovanja, profesionalnih obuka i naprednih kurseva za policijske službenike Uprave policije;
- osiguravanje primjene profesionalnih i naučnih metoda u radu Uprave policije;
- organiziranje saradnje s odgovarajućim organima policije drugih država o pitanjima iz nadležnosti Uprave policije posredstvom Federalnog ministarstva.

3. Vremenski period čuvanja ličnih podataka

Vaše lične podatke Federalna uprava policije obrađuje u vremenskom periodu koji je potreban da se ispuni svrha njihove obrade. Federalna uprava policije redovno vrši periodičnu provjeru opravdanosti daljeg čuvanja ličnih podataka te se svi podaci koji više nisu potrebni za utvrđenu svrhu ili zakonske obaveze bez odlaganja brišu. Nakon prestanka svrhe u koju su prikupljeni, vaši lični podaci se više ne koriste ali se čuvaju u arhivi onoliko vremena koliko obavezuju zakonski propisi o arhivskoj građi.

4. Tehničke i organizacione mjere zaštite ličnih podataka

Vaše lične podatke Federalna uprava policije obrađuje na način kojim se osigurava odgovarajuća sigurnost i povjerljivost kao i odgovarajuća primjena principa zakonite obrade ličnih podataka te smanjenje količine ličnih podataka po principu neophodnosti. Federalna uprava policije poštuje vremenski period čuvanja ličnih podataka kao i njihovu raspoloživost. Poduzete su fizičke, tehničke i organizacione mjere zaštite ličnih podataka koje su propisane Planom sigurnosti ličnih podataka.

5. Koja su vaša prava u vezi sa obradom ličnih podataka?

Vaša prava, uz izuzetke propisane posebnim zakonom, su:

- pravo na pristup svojim ličnim podacima,
- pravo na ispravku ličnih podataka,
- pravo na brisanje ličnih podataka i
- pravo na prigovor.

Za ostvarivanje svojih prava možete se obratiti Federalnoj upravi policije pisanim putem ili putem elektronske pošte na naprijed naznačenu adresu. Ako ste nezadovoljni postupkom Federalne uprave policije, možete se obratiti nadležnom nadzornom organu – Agencija za zaštitu ličnih podataka u Bosni i Hercegovini (www.azlp.ba) ili putem tužbe nadležnom sudu.

6. Prijenos ličnih podataka drugim kontrolorima podataka, prenos ličnih podataka u inostranstvo

Vaše lične podatke Federalna uprava policije može dati drugim kontrolorima ukoliko je to potrebno za izvršavanje zakonom propisanih obaveza. Također, vaše podatke

Federalna uprava policije neće prenositi drugim kontrolorima u inostranstvu, osim ukoliko takva obrada nije neophodna po osnovu zakona ili međunarodnog ugovora koji obavezuje Federalnu upravu policije.

7. Korištenje kolačića (cookies)

Na našoj službenoj internetskoj stranici koriste se obavezni, odnosno tehnički kolačići (cookies). Ti kolačići su male datoteke koje omogućuju ispravan rad internet mjesta. Iste ne možemo isključiti, te za korištenje takve vrste kolačića ne trebamo vašu saglasnost. Obavezni kolačići ne pohranjuju nikakve informacije koje bi vas mogle identificirati.

8. Promjene pravila privatnosti

Federalna uprava policije će redovno ažurirati Pravila privatnosti kako bi ista sadržavala tačne informacije. O svim izmjenama i dopunama bit ćete blagovremeno informisani u skladu sa principom transparentnosti.